

四庫全書

集部

欽定四庫全書

集部

曝書亭集卷七十四至

詳校官庶吉士臣汪彥博

助教臣常循履勘

總校官降調編修臣倉聖脉

校對官修撰臣吳錫齡

謄錄監生臣費思書

欽定四庫全書

曝書亭集卷七十四

翰林院檢討朱彝尊撰

墓誌銘

王處士墓誌銘

彞陵之州有處士王君客代州年月日以疾卒其友  
管代州參將事榆林趙君斂而葬之州城之南演武塲  
之右山西布政司參議清苑陳君首為詩悼之富平李

子為立傳而遺書乞予文誌其墓嗚呼君之制行可謂  
信乎朋友矣君名席民字安生少補彞陵州學生遭亂  
匿山中胡公際亨保湖南聞其才令掌書記城陷胡公  
不屈死處士與諸客皆就縛將刑諸客仰天哀號涕泗  
被面處士慷慨就死監者壯之為言於主帥悉減死分  
籍卒伍處士乃得隸趙君籍中日負芻以供軍饗處士  
芻獨少同伍皆詬詈處士懇之趙君趙君與言大驚遽  
前擁處士上坐解衣衣之遂為趙君賓客會趙君移官

代州引處士自助邊城閒暇處士乃復事文史間為詩  
歌自娛荊州自素宏道倡卑靡淺俚之體鄉曲翕然從  
之繼復蠱于鍾惺譚元春之說詩品愈下處士既交陳  
君遂大變鄉人之習一以唐人為師然往往不肯輕以  
示人輒自焚其草以是存者僅二卷自趙君釋處士于  
負芻待之上客世多以此為處士幸嗟夫士為知己者  
死當胡公被難之日刀鋸斧鑕處士固甘心焉使自改  
其節以處士之才何難力致通顯則非處士之志也彼

夫刀銘斧鑕不足以動其心而負芻又豈足以困處士哉然處士不遇趙君則憂愁困躓其詩必不工間有所作不過與牛童馬走悲吟躑躅于荒山窮谷之中已耳將未為識者所賞又賞者未極海內賢豪之選其言不信于當世則處士之詩終不傳傳矣或不能遠且久然則諸君子所以重處士者雖由處士之才足以動之而趙君之賢尤不可及也已處士生于某年月日卒時年四十有六娶左氏無子一女甫四歲趙君撫為己女銘

曰

乘爾墉幾罌爾首刈爾薪忽釋爾負滹沱之陽雁門阜  
吁嗟趙君葬其友厥銘惟實庶永久

張處士墓誌銘

永年有隱君子曰張蓋字覆輿一字命士以能詩聞工  
草書寇亂後謝去學官弟子悲吟侘傺遂成狂疾嘗游  
齊晉楚豫間歸自閉土室中引酒獨酌醉輒痛哭雖妻  
子不得見惟同里申涵光雞澤殷岳至則延入土室談

甚洽其為詩哀憤過情恒自毀其橐或作狂草累百過  
至不可辨識乃已久之狂益甚竟死涵光輯其遺橐僅  
得百篇刻之又襄其窀穸以年月日葬君于某原嗚呼  
君詩人也工之數十年矣其五言詩尤高簡方詣古人  
而今之可傳示于世者止此悲哉斯人也銘曰  
或游或處或泣或歌家室之不恤而恤其他彼狂者實  
邪是維子之室邪

文林郎知桃源縣事張君墓誌銘



仁和張生某與予相遇濟南將歸葬其親請曰吾先人之卒七年矣餽粥之產猶足以營窆甯其過時不葬者懼銘之非人未足昭於後也願得吾子之文納諸墓庶後之人得以考信焉予辭不獲已乃按狀誌之曰君諱某字某其先世曰淑義者仕宋為右正言從高宗南渡遂家臨安其後代有顯人曾祖某不仕祖某官南京禮部主事父某階奉直大夫知蘭州事母曰崔宜人崇禎十五年纂修玉牒君以貢士廷試駙馬都尉掌宗人府

令萬煒以人才薦詔錄為武英殿中書舍人李自成陷京師賊帥聞其善篆俾更書印篆君辭不能強之官不受拘繫七日脫歸後五年乃就試吏部除知桃源縣事縣濱黃河民困于夫役驛傳官馬多責民芻牧君至盡革其弊士有貧者賙之金粟與揖讓甚恭然彊直自遂往往忤上官意竟以計吏罷職久之客游河南以疾卒于偃師年五十有七娶某氏子三人生為之長次某次某女一適蔡某方君之罷官也攜其子女僑居江都生

自河南扶輿歸殯君于山陽人或勸生葬君江都之鄉  
生不可卒營兆祖墓之側以某年月日封其藏可謂知  
禮也已銘曰

謂年宜永不躋胡耆降於乙巳而終於辛丑謂祿宜豐  
解其章綬棄彼故鄉載之廣柳嗚呼斯人我用是傷九  
九者松卜此陰岡肆乃祖乃父封穴在旁我銘維實逝  
者不亡

殷先生墓誌銘

先生諱岳字伯巖一字宗山姓殷氏先世自山西遷雞澤曾祖某祖某不仕父太白舉人仕至陝西按察副使母曰田安人先生少跡弛然篤于孝友與其弟淵並負才名崇禎三年舉鄉試後數年省其親入蜀值副使公由遵義知府遷今官時流賊寇漢中關南大震分其黨伺副使江上副使將之官先生言曰今逆寇充斥若順流下必墮賊計乃請移檄興安命吏卒迎于江潛以數騎由萬山中出夜抵興安賊大驚以為神會閣臣楊嗣

昌以督師至惡副使抗直誣以違令致賊突圍當坐法  
淵詣闕訟寃不得白而副使以病卒先生再疏為父乞  
遺骸歸自漢中及家京師已陷先生遁居西山與淵討  
賊事泄淵被執不屈死永年申涵光者素與先生為友  
留城中聞賊索先生急募死士夜馳與賊戰脫先生于  
難遂渡江同游吳越逾年乃還吏部按籍除先生知睢  
寧縣事布袍皂帽騎驢至官舍時兵革甫定先生為政  
持大體與民休息治聲甚著涵光遺書勸之歸先生慨

然曰我豈以一官易我友哉遂力請上官投劾歸騎驢  
出縣門學官某者送之于郊先生亟以朝叅衣盡與之  
仍布袍阜帽還里所居鄉曰小砦草屋三楹與涵光晨  
夕唱和相樂也先生為詩自魏晉下屏不觀尤不喜律  
詩謂徒費對儷無益性情故平生所作惟五言古風一  
體莽莽然肖其為人遇佳山水輒留連不去游河南愛  
大隄風土思攜家往強涵光為鄰涵光不果乃已鉅鹿  
楊思聖以病留軹關語先生曰疾革矣得傳青主藥我

庶其瘳乎青主者先生之友太原傅山也時六月霖雨疾馳水石中五晝夜挾之並至蓋其重交游趨人之急多類此先生外和而內介遇田夫野老陶然雜處至見俗士面斥之未嘗假以色笑讀書必窮義理其拒異端邪說尤力知睢寧日有僧用鐵釘木室坐其內募金錢男女往膜拜先生怒欲焚之僧叩頭乞哀卒與之杖里居有祠曰三教堂塑釋迦佛像于中而孔子末坐先生過之恚甚鬻所有田改塑孔子於中俾釋迦隅坐偃僂

若奉教狀既成為義學以教鄉之子弟先生產雖破欣然意自得也予客太原與先生定交每索予為弟淵作傳予未果今年春先生游福建次桃源猶寄予書比予至京師而先生凶問至以六月日病死福州距生萬厯年月日享年六十有八娶康氏無子一女嫁松江府通判曲周張某既歸喪涵光立其族孫某主祭祀卜日葬之副使之兆且具狀來告嗚呼予未為淵立傳於先生之墓是不可以無銘銘曰



葬之者其友銘之者其友無子奚傷有族孫以為後

諸處士墓誌銘

處士錢塘諸君既卒及葬鄉之人共謀所以易其名者  
曰士之有私謚也古也君潛德未顯宜有謚以昭來世  
則曰君年二十遭父喪三十六而妻死竟不復娶事母  
三十七年未嘗晨昏去左右母語人曰是兒五十餘髮  
頽白矣乃戀我如五六歲者謚法能養能恭曰孝君有  
焉衆皆曰可則又曰君之棄諸生也年未四十日以文

酒自娛閉戶不出者二十載先是崇禎間歲大侵民饑死相藉君家無盎斗儲為粥覺苑寺以食餓夫瘞族人死者一十六匱又上救荒三策開米禁行改折設義倉監察御史從之全活甚衆其後兵相持江上白骨滿道人不敢收君出私錢悉掩之六和塢下南贛巡撫某移官浙江與君有舊君卒不往見謚法好廉自克曰節君有焉衆皆曰可遂謚君孝節先生於是君之子九鼎以狀來請誌朱彝尊曰是足以誌君墓矣君諱玄振字以

默一字慶倩生而有文在手曰丰故又自號丰山曾祖  
某祖某考某俱有文行母張孺人配程氏生子男二人  
九鼎匡鼎皆知名女一人嫁王某孫男二人辛發壬發酉  
發女五人君生某年月日其卒也以某年月日年五十  
七孺人程氏後君十月生先君二十一年卒年三十六  
年月日合葬于靈隱山之陽實先世之兆銘曰

是惟諸氏之阡永吉无咎鼎也藏孝節先生之匱妣附  
其右於戲

歸安縣儒學教諭馮君墓誌銘

年月日歸安縣儒學教諭馮君以疾卒于官舍年七十  
有四其子金滢舉柩歸貧不克葬後若干年葬于某原  
馮氏世為嘉興人君之曾祖某祖某父某皆不仕君少  
好讀書有孝行父病醫言割股可療君遂如其言母疾  
亟亦如之補秀水縣學生工時文兼善韻語與松江王  
廷宰慈溪劉繩之同里項真同學真推餅山大宅舍君  
序其排輯無事編雕刻行之顧省試輒不利年六十五

以歲貢試京師又二年銓授紹興府儒學訓導歷七年  
遷于歸安未朞而卒君平居好為善言以勸鄉里徙宅  
者八之官者再所至鄉之縉紳耆老門生弟子聞其言  
輒目為善人無異詞嘗村居過鄰人飲鄰有怨家為盜  
率其黨來報仇盜先至閱鄰人戶見君方持酒數以善  
言勸其鄰出戒其黨勿入君歸及舍盜殺鄰人妻女火  
其廬而去嗚呼自世日降躬行之君子吾不得而見之  
矣苟出其善言以導人為善抑其次也夫盜至不仁猶

感君言之善相戒勿入況夫吳越之士聞其言有不遷  
於善者哉則君之所施遠矣君諱鎮鼎字子晉初名虎  
嫌與古同名乃更焉娶俞氏早卒再娶胡氏賢而無子  
君有子一人金滌也女五人其一歸于我銘曰

言之善行乃踐遇則塞施諸遠誰為銘其女夫彞尊名  
姓者朱

朱開仲墓誌銘

君姓朱氏諱扉浙江嘉興縣人曾祖某祖某考某俱不

仕君少有文自以多病不娶好覽方書知醫旁通釋氏  
肯屏去肉食遇讌會強之乃至進杯酒而已方子避兵  
練浦君居南村予村北每相值覽予詩欣然肯和予病  
為治藥裹留終日不去憂見於色屋三楹井竈之外薪  
數束粟一盞篝燈布被無餘物晨起淘米躬執爨恒留  
予共飯去則鍵戶凝坐以為常予既徙宅梅花溪漸與  
君遠既而游四方歸輒出及訪君則已死年若干歲會  
其鄰欲瘞君乃銘以納其壙嗚呼君雖學於佛視飲食

男女無足動其心然與之言及父母存亡輒歔歔不止  
見人有疾若已疾蓋篤于行而有所不為者也銘曰有  
男子曰韓畱生北平旅江鄉訪吾長水登吾堂援琴操  
縵彈清商終身不娶難意量靡也方之殆舅友絕嗜欲  
宜老壽胡二人止盧首我銘靡藏表畱名開仲靡字畱  
石畊

徐先生墓誌銘

崇禎三年秋漳浦黃公道周來典浙江鄉試榜既放以



力學勗門弟子久之公以言事獲罪出至杭州愛大滌  
山治精舍著書門弟子皆從講學甲申以後忠節則慈  
溪劉振之而強錢塘姚奇胤有僕經術則海寧朱朝瑛  
美之仁和孟應春長民餘姚何瑞圖義兆書法則嘉興  
汪挺無上而徐先生柏齡節之以詩畫頡頏其間黃公  
贈以五言曰節之貽我詩十章大清脫其賞譽若是先  
生五試禮部不利署永嘉縣儒學教諭歲乙酉兵部尚  
書張公國維督師于浙黃公乞其師誅馬士英阮大鍼

以謝天下計不就先生遇之金華相對泣下會南京破黃公旋死于難先生自甌間道入閩一官轉徙出入江海中尋匿羅陽之天闕山亂定始歸里或勸先生仍與計吏偕先生笑不應也先生於學務博經史之外旁及三乘九籀以及方書命訣穴法靡不研究黃公戒之曰神仙我道之僕隸釋典大學之灰塵先生乃反約焉迨身罹禍難衝波潮蹈鋒刃幸而獲免乃復參禪家宗旨深自晦迹蓋憂患之餘有託然矣徐氏之先太宰諱德

夫從宋高宗南渡傳至志善明洪武中舉賢良方正其裔孫曰廷瑞者先生曾祖考也曰修職郎恭城丞霑者祖考也曰歲貢生弘源者考也曰處士弘澤者本身考也配潘氏先生卒時年七十有三子三人燦心某某孫男六人女二人自處士以詩畫名萬歷中與李少卿日華陳徵士繼儒聲相埒傳有竹浪齋集先生繼之至燦心三世皆善詩畫論者以為難先生之墓也燦心來乞銘嗚呼士君子生革命之時守硜硜之義流離困阨其

官閥行事不多表見則惟鄉黨後死者知之然語焉而終不詳也宋文信公死柴市當時守義不為元屈者皆其弟子賓客作史者諱不書儒生懷古遠輯舊聞為遺民錄猶憾其湮沒不傳者多也黃公殉國與信公無異而先生實出其門秉師之訓終始不渝其節安知後之論世者不於國史之外錄及遺民則先生其一矣是不可以無銘銘曰

仕有版官無解守師傳遊靡悔

孝子長洲劉君墓誌銘

君諱龍光字蓼蕭遠祖曰德基自汴從宋高宗南渡官  
黃州統領居建康其後曰順之仕元為平江路權茶提  
舉遂家焉曰政中明建文元年鄉試第一方公孝孺之  
所拔也金川門之變痛哭不食死追謚靖節先生嗣子  
曰鉉歷官詹事府少詹事卒謚文恭其曰璫者君之曾  
祖也祖曰衡父曰廷諤以宜黃縣丞遷益王府長史遭  
亂挈家人避兵白石嶺下依其友姚肅甫以居尋卒君

初以省試還里兵後不知父母存歿日夕涕泣家故貧  
徒步至建昌訪益府故舊無存者禱于張令公祠夜宿  
廡下夢神告曰寄居石潞覺而詢之土人蔑有知其處  
者君持零丁帖彷徨道左有一尼謂曰是在閩粵之交  
官路方構兵道梗塞由僻徑以往七日可達君如其言  
越藤峽通仙嶺一綫天皆崇山邃谷潛狙號虎所出入  
未度白石嶺路尤險惡嶺萬仞蟻旋而上下臨絕壑又  
萬仞得微徑棘荆蔽之血漬足蹠力盡乃登俯視山下

有村村中板屋三楹流泉泱泱鳴石上君心動以為石  
漈也叩其戶則母管孺人出焉喜劇而哭問父所在則  
亡踰年矣又大哭問殯何地則在板屋中又哭村民聞  
哭皆來觀曰吾鄉宋時有孝子王龍山者於此見其母  
故堡以見母名今子復見母此地是亦孝子矣於是君  
謀歸喪肅甫首以白金為助村氓咸樂用力藤束其棺  
以百夫舁之踰嶺而下遂浮江以達於里監察御史李  
森先巡按江南欲聞之于

朝君曰常事耳不可乃止君歸十年母卒喪葬盡禮平  
居好讀書研精小學旁通醫術以及風角地辰截壬遁  
甲之說靡不考索康熙十一年元日筮得大過之蹇數  
曰過涉滅頂吾其不免乎是年十一月果卒年六十有  
四娶沈氏繼娶吳氏子男二人椿齡石齡女一人壻愈同  
珩孫男女各一人石齡與予善君之葬也來請銘銘曰  
孝之至通神明身雖隱名則光吾友其子銘其藏卜茲

幽宅斯永臧



文學沈君墓誌銘

君姓沈氏諱進字山子初名馭補學官弟子更焉先世  
有仕元官提舉諱福一者自湖州徙嘉興居城南放鶴  
湖其子晶一避楊完者兵始遷梅會里曾祖考朮祖考  
文輝考福基世有隱德君年十七工時文要非所好既  
交予日以詩篇酬和鄉人目曰朱沈錢塘陸圻過予書  
屋遇君將揖問何人予稱字以對圻大聲曰得非梅花  
高館落春草斷垣生之沈山子乎曰是也遂留飲盡歡

而散未幾予南度庾嶺君乃結同里周簣賦古今詩合  
成一帙鄉人復以周沈目之簣好周人急獨君一介弗  
取惟招之飲不拒然坐有惡客聞惡言憤不能平張目  
變色使酒面詆譏勿顧也平居不憂貧見簣貧則憂之  
語人曰谷風之詩忘我大德思我小怨夫人受恩于人  
本無可怨思之思之而怨生焉祇見其小而已或曰君  
蓋有感于中言之君為文先民是則故每試不利同學  
故人有以舉子業致位通顯者雖遺君書置勿報一旦

訪予京師數過予旅話俄而騎驢一頭蹇躡返歸  
自號知退叟所居藍村力圃屋三楹主人毀其一  
力不能補因目曰半巢居教子翼讀書手自抄錄  
陶然自樂也所著有文言會粹行國錄東園詩藍  
村豪半巢居豪退叟行吟力圃蕭閒詞袁溪文彙共三  
十餘卷君晚適館于桐鄉汪氏並坐飲當杯入手無疾  
一笑而逝年六十有四先娶朱氏再娶章氏繼又娶鄭  
氏海鹽人有儉德事必先為之備君沒後持門戶一十

五年畢君未竟之志葬其舅姑課子娶婦嫁女皆以禮  
卒年六十有六子男一人翼也居喪盡哀甘露降于壘  
廬藤葛者三人稱其孝女四人一嫁陳丹腹一嫁李某  
一嫁繆啓武一嫁朱丕戡予從孫也孫男三人女一人  
年月日翼奉二人匱葬生字圩之盛家橋銘曰

魯經取人必也狂狷有所不為斯擇之善思我故人庶  
幾可入作者之林獨行之傳者乎

處士文君墓誌銘

康熙四十有三年夏四月處士長洲文君點以疾卒于  
郊西之竺塢其子赤病不能擗踊涕洟被面醫言心已  
傷不可療踰月亦卒所居丙舍三楹遺孫永泰張帷堂  
于中左虛其右坐賓客四方來弔者咸稱其善居畧克  
盡禮云文氏之先自廬陵徙衡州載徙徐州復自徐徙  
杭居吳自社學教讀惠始惠子涑水儒學教諭洪洪子  
中順大夫知溫州府事林林仲子翰林院待詔徵明徵  
明子國子監博士贈文林郎彭海內所稱三橋先生是

已是为君高祖曾祖元發朝列大夫同知衛輝府事祖  
震孟累官嘉議大夫禮部左侍郎兼東閣大學士贈尚  
書謚文肅考秉承廕官生經亂隱居不仕妣申孺人廣  
西布政司右參政用嘉之女君幼能詩從長者泛石湖  
有長橋連月湧遠水隔山分之句坐客交歎賞年十二  
寇陷京師君泣曰國破矣奚以家為既而仲父棄授命  
產果破乃依墓田以居盡屏時文肆力詩古文辭兼縱  
筆為山水人物善鑒者以為不失高曾規矩也執親喪

三年止酒徹肉晝夜居于外服除祀事惟謹朔望肅衣  
冠拜宗祠遇忌日雖風雨必返祭兄然為逋賦所累君  
轉貸親懿輸之官兄子作客還不以言也年四十涉江  
淮溯河洛薄游京師京師貴人或告君曰子之先世多  
以薦授官子曷仕乎當以國子博士薦君君謝曰士各  
有志行將老矣公何忍強點以所不能乎遂引去君素  
無恒產暇嘗舍蓮涇慧慶僧寺賣書畫自給有富人子  
具兼金求畫期以三日走取君恚曰僕非畫工何得以

此促迫我擲金于地其人再請不顧至常熟畫家請觀  
笥中畫君曰若以賣畫者目我邪何觀為倒巾箱示之  
無尺幅也巡撫湯公弼屏車騎入寺問為政之要君曰  
愛民先務在去其害如虎邱采茶府縣吏絡繹徵辦積  
弊有年公能除之即善政矣湯公乃伐其樹公嘗語君  
曰聞先生止存田三畝何以為饘粥計君對曰貧者士  
之幸也菜羹蔬食足以安人性情堅人操行少或有餘  
將移所守負先世家誡矣公稱善一亭戶擁厚貲以千



金為君壽請通姓名于湯公君曰湯公以道義交我我  
豈可以利干公縱我有請公不應也若無故以貨餽人  
傷惠我無故受貨傷廉二者交失毋敗吾名亭戶慙而  
退君內和而外嚴口不道人過其為善孜孜若不及鄉  
賢楊禮部循古墓在洞涇橋南久為芻牧場君與其友  
伐石為表植以松楸寒食則攜酒榼以祭又請建三講  
官祠于虎邱之右以祀厥祖其二人則陳文莊仁錫姚  
文毅希孟也君為學熟習典故與人談娓娓不倦獨不

喜世儒講學謂書生上不能致君堯舜下不能施德于民載道無文退而講說性命所行所為事虛文而寡實行借以文飾其自私自利之心亦何取焉君子謂切中俗儒欺世盜名之病晚修文氏族譜本温州守之訓謂人立身自有本末出處自有據依何必附承相信公以為重故自蘇州分派始一世二世至十一世族譜甫成而明年君逝矣悲夫君字與也晚自號雲南山樵所著文集四卷詩集十卷娶邱氏先君八年卒子二堅早夭

赤字周寫有石室山人集五卷讀史記疑二十卷孫二永泰永豐君之將卒也遺命永泰屬予銘其藏當天啓二年先文恪充會試總裁文肅公試禮部名在弟子之列兩家締世好君與予交尤篤分不敢辭君嘗好予五言詩按潘昂霄金石例王行墓銘舉例銘辭無作五言者然洪适隸釋所載自漢世已有之爰作銘曰

崇禎十七載宰輔五十人文公宣麻日朝士氣一伸五旬拂衣去人亡國胥淪有如陶公侃宜有泉明孫點也

式祖訓不以富易貧瀟灑弄翰墨澹泊棲松筠雖曾客  
京洛素衣屏緇塵伊人洵難得可宗亦可因誰搜遺民  
傳庶其考吾文

曝書亭集卷七十四

欽定四庫全書

曝書亭集卷七十五

翰林院檢討朱彝尊撰

墓誌銘二

奉政大夫提督福建學政按察司僉事山陽陸

公墓誌銘

公姓陸氏淮安山陽人諱求可字咸一別字密菴又字月湄曾祖考某祖考某考某妣某氏順治五年以禮記

舉江南鄉試後七年登史大成榜

賜進士出身明年除知裕州三載報最入為刑部員外郎  
歷郎中以按察司僉事提督福建學政任滿稱職應遷布政  
司參議需次還年六十有三康熙十八年七月以疾卒兩遇  
覃恩初授奉直大夫再授奉政大夫配某氏某官某子  
某官某孫某官某曾孫封宜人後公十六年卒又四年  
與公合葬于某原公于事親主愛敬其身謂身誠而事  
親之道可盡身也者父母之身子孫所從出也能愛敬

其身而後能勤學能勤學而後所交皆敬身之士矣于  
擇交謂朋友之義貴恕以處之不當自居于薄夫牆薄  
則壞繒薄則裂器薄則毀酒薄則酸未有薄而可久者  
于居官謂君子所養要令暴慢之氣不設于身體必操  
切擊斷之意少而平易中和之政多理為事之本事為  
理之用臨事不為私意所動所藉平日有居敬窮理之  
學然矣于學術以主敬為先務而本乎治心言必述六  
經多師以為師而所宗者朱子餘錄其長去其蔽上自

象山下至陽明諸弟子未嘗槩事排擊持論甚平要其  
大旨在乎善天下故施之于政而政舉觀之于文而文  
化成自裕州以後恤郵丁減鹽引闢污萊清冤獄正文  
體絕請託端士習修祀典力行教化孜孜不少倦蓋儒  
者講學之效見諸行事者公有焉公著密菴詩集十卷  
文藁一十六卷詞選六卷語錄四卷子五男三人志謹  
歲貢生候選國子監學正志寬太學生志默亦歲貢生  
女二人孫男六人女七人公之墓也未刻銘于幽宅志



謹請于纛尊遂為文誌公墓錢之丙舍之壁銘曰

舜跖之分差以毫釐有恒斯善惟聖是睇苟或舍旃取  
徑則岐平旦之氣反覆牯之陷于禽獸其幾孔危公列  
以圖善利從違性根于心四端匪昧若火始然若泉始  
需由茲生色睟面盎背苟或不然形體交頽曷不由聖  
混濁是汰公列以圖所養者大世之學者執一不通伸  
宋抑漢伐異黨同公探理窟六經是宗濬源濂洛達之  
湖江人善我取人惡罔攻一話一言振惑發蒙豈惟空

言施諸實用有鑑畢照有慮必中簡彼征徭追其疾痛  
嚴乃不苛寬以毋縱君子所莅式歌且誦洎乎歸田著  
錄彌衆既稱循吏亦曰真儒實也久充名亦不虛有子  
有孫克守其初并此吉壤樹以枌榆既安既固慶則有  
餘我銘公藏勿罔勿諛

奉政大夫吏部考功清吏司郎中顏君墓誌銘

顏氏望曲阜自路回父子事孔子孔子弟子受業身通  
者七十有七人顏居其八回雖大其子孫特蕃由漢迄

今多以忠孝文學著路傳六十六世曰胤紹崇禎中知河間府事城破自焚其子伯璟鄉人私謚孝靖先生曩尊嘗表其墓者也伯璟娶朱氏鎮國中尉某之女兗州破日為邏卒所驅以刃劫之不前及刃擊臂臂折罵不已乃殺之牆下歷四日復活君朱出也生崇禎十三年正月甫三歲亦陷亂軍中乳母孫抱之得出九齡工行草書十三嫻詩賦旋補四氏學生員以副榜入國子監康熙二年舉鄉試六年成進士除國史院中書舍人會

天子幸太學加恩四氏子弟之仕于朝者遷君禮部儀制清吏司主事明年充會試同考官出監督龍江關稅既還京師尋調吏部稽勲清吏司主事奔父喪歸服除補驗封清吏司主事加一級歷本司員外郎遷驗封司郎中封奉政大夫未幾轉考功司郎中充一統志纂修官康熙二十五年九月晦以疾卒年止四十有七君長身廣顙早慧好讀書折衷羣儒言自出新義其于大學章句持論尤斷斷詩嬾漢魏南北朝唐宋元明諸家之

長有集若干卷又述音正音變訓蒙文釋家訓若干卷  
獨不信浮屠星命之說嘗曰軀體猶炭也神氣火也火  
傳于炭然後能為功顧其勢漸消而不可止則生氣之  
鼓盪也夫炭當風則易燼扇之則立燼置之密室覆以  
灰則後燼要末有不燼者然則謂人可長生者妄也謂  
死有時不可先不可後者亦妄也君子以為篤論雅善  
鼓琴精騎射蹋鞠旁通勾股訣尤耽山水西登太華循  
伊闕南浮江淮觀濤錢唐沂三衢凡所游歷必命畫手

為圖得金石文恒懸之屋壁性孝友勤于睦族居鄉以  
禮讓人立朝遇政事侃侃不阿有一善未嘗自矜也君  
諱光敏字遜甫更字修來別字樂圃妻孔氏封宜人子  
肇雍國子監生女子四人俱配士族君卒之明年肇雍  
以君之喪歸卜葬于曲阜將發叩纛尊之門杖苴請銘  
纛尊與君交二十年矣君之葬銘何敢辭系曰

生乎陋巷之里歿乎宣武之坊葬乎侍郎之林祭乎復  
聖之堂年逾強仕不為大也秩以大夫不為小也吾銘

君藏久而有考也

儒林郎戶科給事中邵陽王君墓誌銘

儒林郎戶科給事中邵陽王君以官卒其弟又維聞君喪重趼至京師將扶君之柩以行抱其遺孤鳩凶服立于門請秀水朱彝尊銘君之墓彝尊不敢辭序曰

君諱又旦字幼華別字黃湄自曾祖結以上為農百良村祖必昌始讀書補學官弟子多善行鄉人私謚為孝惠先生者也考圖南以君仕封文林郎君少學于仲父

斗南博通六經順治十四年以易舉于鄉明年會試中式又明年殿試賜進士出身當授推官未除改知安陸潛江縣事潛江居漢下流長隄逶迤百里水防一決禾黍盡沒君躬巡隄上先事預治又田畝租賦徭役多苦不均君以鄉規田以田均畝以畝定賦於是無田者得免役逃移悉復其居期年百廢具舉乃建傳經書院以課士築說詩臺葺操縵軒以燕賓客會軍興縣當達道羽騎絡繹君峙糗糧芻茭無後期旋以治行徵詣



闕下需次除給事中俄聞父喪奔歸里讀書中條山之  
陰芝川之上服除補吏科給事中轉戶科掌印給事中  
典廣東鄉試嶺南物產繁富珠香象犀滿城市遊者踵  
接于道君以奉使闡事畢入羅浮山既出嶺復登匡廬  
比還

朝詩卷外無長物也花山接峒人壤土寇結連出沒劫  
商旅君疏請建縣治設官吏廣州四縣交賴以安君性  
純孝執親喪盡禮與諸弟同居未嘗析爨奉錢所入悉

以委之性嗜書詩義尤所好嘗錄李櫟黃蘗詩解累萬  
言又博求宋元人說詩善本將輯成一家言未果惟詩  
集十卷傳于時其詩兼綜唐宋人之長獨不取黃庭堅  
人有佳句輒賞擊不已江都郝士儀善詩隱于賈君與  
為友士儀死哭以詩甚悲又歛人吳周賦杜鵬行君見  
之驚歎周死君序其詩鏤板傳焉卒之前十日語其弟  
子朱載震曰吾年五十一爾精力早衰慮不久人世  
人亦何苦卒于官吾將假歸已營祠堂于宅居之東祀吾

祖考擬以仲父配焉請秀水朱十考禮以為之記記  
成吾其歸哉益君疾止七日而死矣嗚呼恠矣娶范氏  
繼娶張氏俱封孺人子二人長鵠瑒存者鳩也女三人  
一嫁潼關衛楊楫一許韓城賈締芳未嫁卒一尚幼銘  
曰  
勿將者年未達者官惟其詩足傳名以不刊

掌京畿道監察御史任君墓誌銘

君諱珣字少玉別字希菴姓任氏其先家大梁宋世有

知高密縣事者留居焉名其里曰梁尹社曾祖某山西太原府通判祖某縣儒學生員考某贈承德郎監察御史妣鹿安人君中順治十四年鄉試明年會試中式聞父疾亟歸父沒治喪盡禮十八年服除補殿試

賜同進士出身知汾州石樓縣事六年多惠政擢浙江道監察御史巡視西城京倉長蘆鹽法回掌京畿道事京師坊市賈人多以私錢牟重息有印子墜子轉子之目貧民稱貸者不勝其苦君告示禁之廣西亂初定錢

糧帶徵未完逃亡者相逐君疏請蠲之又言桃源以北  
河無支流祠堂邨家諸湖舊以潑水今多淤塞宜乘水  
患未至挑濬庶河流不致潰決又言滇黔既平各營鎮  
冗兵議裁裁之不得其道則為患日深宜消其迹于無  
形不可使曠久生姦冗之念論者皆服君之遠見也君  
善書朝回輒摹仿晉唐人書法語人曰吾以收其放心  
爾其巡視長蘆都人士賦驄馬行送之君獨賞予作既  
還朝以所購懷素草書千文趙孟頫時苗留犢圖屬予

卷七十五  
審定跋其尾其冬盜入予室竊之以去君聞之勿恚也  
遇予慈仁寺謂曰物之得失亦有定數是卷流傳數百  
年藏者豈吾一人哉因請更跋他卷蓋其達觀如是君  
以明崇禎五年六月日生康熙二十六年四月日卒享  
年五十有六娶閻氏贈安人繼娶丁氏封安人子男三  
人筠歲貢生塤縣學生坪康熙二十年舉人知名于時  
女三人壻某某君之歸喪也偁來凶服立于門請銘  
君墓及葬乃為銘曰

生乎齊而視嚙乎齊鄉黨以為光榮也守其官而遽卒于官  
親懿之所屏營也城曰介根水曰濰膠卜茲幽宅千齡不  
朝

知伏羌縣事蔣君墓誌銘

文林郎知伏羌縣事蔣君之墓秀水朱彝尊因其子之  
請誌其墓曰君杭州海寧人早慧十齡赴童子試未冠  
補學官弟子崇禎九年舉鄉試出建昌新城黃公端伯  
之門三試禮部不利歸闢一畝園于南村蓋無意于仕

卷之十五  
吏部按籍授經雲儒學教諭縣經亂無學舍乃僦居  
樊氏宅宅故延平訓導阜所遺有天際樓羣山羅列案  
前阜詩所云烏柏蔭我牆白茅覆我屋者也君乃講學  
會文拔麻成璋鄭載颺于諸生中後先取科第有李華  
者獲罪知縣事汪宗魯欲申上官黜之君請于汪不聽  
淚成行下汪問故君曰華孝子也曩遇寇伏草中其父  
負大母逃寇將殺母父請代華乃躍出求代父死寇並  
釋之願明府毋黜華以教孝汪為感動裂其牘君性耽



山水涉惡溪梯暘谷周覽桃花之隘芙蓉之嶂縣境諸  
山旁及于天台孤嶼迨遷知伏羌縣考稽禹迹積石朱  
圉所至題名于甌逾年落職歸自稱南村退叟布衣席  
帽徒步瓜塍麥隴間終年不入城府日以詩文自課合  
少壯所作多至萬篇手自汰除猶存五千餘首其言曰  
作詩大義以言志為本六朝詩不必學漢唐不必學六  
朝宋不必學唐元不必學宋今人亦何必宋元是學乎  
君之歌鹿鳴也一榜詩人最盛仕而達者曹公溶鑒躬

王公庭言遠而鄞有萬泰履安周齊魯唯一杭有徐之  
瑞蘭生未有巢鳴盛端明君既退歸諸君酬酢靡間又  
與曹王兩公居相近琴歌酒坐應和不乏特不與馳騫  
浮名者相接故其詩文不甚傳于時第取自怡悅而已  
君年八十有四而卒娶姜氏子男二人名世歲貢生名  
表國子監生女五人壻褚蔚文殷光遠吳源達周文焜  
沈朝英孫男六人女三人葬其縣其原銘曰

學焉而為經師仕焉而稱循吏文達夫辭詩言其志鳴

呼先生惟不務名而名自至吾言不誣信于百世

工部主事席君墓誌銘

君姓席氏先世望安定遠祖武衛將軍溫避黃巢亂渡江徙于吳居洞庭之東山曾祖洙祖端攀皆不仕以孫子本楨貴推恩均贈太僕寺少卿崇禎之季寇賊搆患歲旱蝗人相食本楨饒貲財發其橐白金八千兩糴米于襄樊輓之以舟順流下東賑青兗南散給吳越全活者無算而又請毀家以佐軍儲巡撫應天都御史分宜

黃希憲聞于朝特授文華殿中書尋加太僕寺少卿階  
亞中大夫君本楨之季子諱啟寓字文夏以國子監生  
援例補工部虞衡清吏司主事

皇朝設六部職掌多準明代工部四司虞衡掌山澤之  
禁鼓鑄之局驗試之廳盔甲之廠除道捐溝之役事最  
繁瑣君遇人以和與物無忤甫涖官兼攝營繕屯田二  
司庶務悉理旋吏議鶚級留任尋加二級

覃恩勅授文林郎贈厥考如其官封母延太孺人既而

請假養母以所居僻左獨學無友乃徙居常熟春秋佳  
日板輿奉母往來題其園中居曰娛暉之堂滋蘭樹蕙  
周覽湖山之勝歲己卯

御舟渡太湖親幸其園君拜伏階下

天子顧問曰爾年方壯何以不來供職巡撫都御史宋  
公犖對曰是以終養其母請回籍者

天子為之霽容手摘盆中蕙蘭花登舟明年延太孺人  
卒君居喪盡禮終三年未嘗去衰麻齒肥甘也服除甫

七月而君卒享年五十有三君家居以孝友敦睦聞鄉里及在京師遭季父喪解官持服歸修族譜置祭田立義學人有稱貸者未嘗權子母質庫不計錙釐人咸樂其寬厚少間業於華亭葉生有聲生固幾社名流也予友平湖陸君隴其學以躬行為本既釋褐知嘉定靈壽二縣事循行居天下第一徵入試四川道御史落職歸君夙與訂僑札之分具書幣聘之至家教其二子永珣前席陸君沒君厚賻其喪葬申以婚姻集其遺書悲為

開雕行世暇又輯唐人詩百家亦鏤版行之

天子幸第時曾進

乙覽一時言詩者返之正音焉永恂前席俱歲貢生亦  
從予游君之葬也兩生來請銘嗚呼躬行之君子吾見  
罕矣以言乎論學則以正以言乎取友則必端以言乎  
仕進則知止蓋得夫陸君講習之益者多也是不可無  
銘辭曰

古之葬者寔用石賁書方遣書策後乃納銘于丘阿辭

苟達不在多席君新阡頂山麓治繭室封斧屋樂哉斯  
丘無後艱宜爾子宜爾孫孰銘其藏小邾氏匪異人陸  
君友

曝書亭集卷七十五



欽定四庫全書

曝書亭集卷七十六

翰林院檢討朱彝尊撰

墓誌銘 三

孝潔姜先生墓誌銘

慈谿姜君宸英詩文傾折海內士

天子知其姓字然屢赴鄉試不見錄也既而用薦入史館支正七品俸纂修明史又分撰一統志月給餐錢衣

儒生衣雜坐公卿之次會

覃恩敕授文林郎贈考妣如其階歲在己巳冬刑部尚書總裁官崑山徐公乾學告歸

詔許以書局自隨公上言引君自助於是君將還葬其考孝潔先生于夏家舉華盆山之陽妣孫孺人祔焉持狀請彙尊誌其墓誌曰先生諱晉珪字桐侯別字卓菴先世自蜀遷于越居嵎縣再徙餘姚復徙慈谿曾祖國華丁士美榜進士累官陝西布政使司右參議階朝列

大夫贈太僕寺少卿祖應麟中先文恪公榜進士以戶  
科給事中抗疏爭鄭貴妃冊封謫典史後歷太僕寺少  
卿階中憲大夫贈太常寺卿父司簡官戶部司務母向  
孺人妻孫孺人先生少補儒學生員貢於鄉年三十七  
不復應舉研精理學工詩兼通六書辨其源流又嫻經  
世之略性至孝友愛諸弟與人交愷易然取與必以義  
雖勢力不能奪也太常公以廉節自勵遺產僅百畝司  
務君兄弟分受之先生弟弟又三分之一力不能給饘粥

兵後家計益窘無以為親養乃游學北至燕趙東浮洛  
西游秦蜀東修所入歸以養父母孫孺人曲成其孝一  
味不以自甘必先進舅姑曉問寢安否庭闈燕衎靡以  
異先生在家也先生既遠親舍歲時恒望鄉遙拜發為  
歌詩多幽憂悱惻之言音甚酸楚今所傳泛鳧吟藁是  
已迨向孺人歿先生適在旅次訃至嘔血數升遂中失  
血症服除將之瑞州道出常山疾發卒於草坪旅舍時  
康熙十一年五月日也年六十三宸英扶其柩歸先生

之執友張能信林三錫等交泣下僉曰君之事親可謂  
孝矣君之高蹈可謂潔矣遂諡曰孝潔先生先生歿後  
七年孫孺人亦卒孺人國子監生之蒞之女朝列大夫  
知德州事森之孫贈朝列大夫某之曾孫子男二人宸  
英宸芝女一人嫁儒學生員凌珫孫男三人女六人嗚  
呼自先王制產之法廢士之貧者無以養其親於是陟  
岵鵠羽北山蓼莪四月之詩作焉雖不能養與祭君子  
必以孝子目之蓋惜其遇而憫其志之不得已也先生

之孝終食不遺其親顧以貧故適四方資僚友縞紵之  
貽以供菽水是亦潔白之養矣子職未盡者孫孺人以  
婦道成之宸英又克繼其志然則先生可無憾於泉下  
而因行受名庶幾克副其實者乎於其葬也宜銘銘曰  
學焉而弗措也才焉而不過也勞人之賦也孺子之慕  
也有賢妻為之助也有令子為之嗣存故反也子未服官  
而贈及其親遭遇之異數也考卜于原有免者檀有斃  
者粉葬先生於是嬪也祔此幽宅既安斯蕃衍而孫子

贈日講官起居注翰林院檢討徵仕郎貞靖潘  
先生墓誌銘

康熙十有七年春

天子有詔徵文學之士吳江潘君未被薦明年

召試體仁閣下賦最工以布衣除翰林院檢討越二年  
充

日講官知

起居注其冬雲南平

天子推恩及臣下於是君之考處士貞靖先生得贈

日講官

起居注翰林院檢討徵仕郎君之妣章氏贈孺人母吳氏封太孺人又明年會試天下士君與分校得人最盛又明年遭劾謫官吳太孺人歸卒于里君聞訃奔還旋卜地鷲脰湖之南以康熙二十五年閏月辛酉合葬焉先生諱凱字仲和一字豈凡別字貽令世居吳江平望市曾祖雲隱居不仕祖志伊中嘉靖四十四年進士仕



至廣西布政使司右參政父錫祚湖廣布政司理問母  
吳孺人先生事親孝事兄最恭其為學殫心經世之略  
其文見稱于太倉張采與同縣吳允夏包捷吳翽文章  
行誼相切劇補縣學生員連試第一當是時在朝之君  
子多自附東林而海內名士以聲氣應和曰復社先生  
與焉周之夔者與諸君子構難撫君過作復社或問而  
無錫馬公世奇太倉張公溥並力爭之德清章君日烱  
愛君文以女歸先生既而知吳江縣事先生深自退匿

未嘗干以私惟於清賦額疏水道事關民利害則建白行之先生為詩典雅尤工尺牘雖忽遽不作草書遭亂破家遂屏棄時文纂平望志及本草類方合文集凡數十卷子三人裡章楨吳存者耒也女三人一嫁周撫辰一許嫁顏祁未行卒一嫁陳鉉孫四人吳太孺人在室以孝聞嘗刲股療母病為先生繼妻撫前妻子女如已出既寡家酷貧手紡績延名師訓耒以通經博古及耒為侍從臣太孺人未嘗美衣食君既謫官太孺人無幾

微不自得之色曰窮達有命安之可矣貞靖先生卒時  
年四十有九章孺人卒年三十有二吳太孺人年六十  
有六彞尊與君定交也久同年被薦同以布衣授官同  
知

起居注其謫也又同時熟聞君家世於君請銘不敢辭  
銘曰

相彼貞木其實有蕢或碎於地或登於槃而終以勿餐  
嗚呼先生既昌而文以詒後昆阨窮奚怨

贈翰林院檢討徵仕郎徐先生墓誌銘

翰林院檢討吳江徐君鉉請假還里葬其考妣于光字  
圩逾年矣既而謫官去屬同年友朱彝尊為文表諸墓  
銘曰

君之先人韞奇諱其曰季華冠而字上世本居魏塘界  
遷於吳江自碩始西濛之港面積水以耕以耨治農事  
先生為儒試不利仰屋著書抽腹笥遯世无悶窮勿悔  
兄當餽運渡江介是時淮北人為戡先生愛兄心孔悻

以金三百輸諸吏兄得不行方用慰兄子曰鑛結壯士  
以保鄉黨計不遂亡命西吳全匪易先生詣吏慷慨對  
產雖破碎禍則解嘗懷白金步入肆人壓看場集如蝟  
舄前囊囊遺在地誠以語人人作偽探懷乃悟已所墜  
發之銖兩皆默識人慙欲以半相畀先生怡然笑勿視  
衡門之下可樂志釀秫種花性所嗜孺人王韓先生配  
有子克家孫克類伯也不仕仲委質揚名顯親光有位  
贈徵仕郎通貴揭石於原表風義猗嗟千秋永無毀

小譚大夫墓誌銘

小譚大夫吉璉諱舟石字嘉興人以祖父嘗為大夫既仕以小譚大夫自別大夫之祖諱昌言山東布政司參政贈太僕寺卿父則五經進士諱貞良也母宜人朱氏是為彝尊之姑大夫年十四通五經旋補學官弟子弱歲以文貢入國子監南京不守大夫從父母攜弟妹妻子浮海至會稽復自台州抵福州轉徙漳州道遇寇父被傷大夫力以身蔽寇拔刃睨之不動鎗擊其背不去

寇曰孝子也舍之父病歿家人三十口留亂軍中斗米三千錢卒全活扶父柩還尋以貧游學四方客汝寧聞母病疾歸則已蓋棺大夫號踊以頭觸棺棺釘破其顙血濡縷既絕而蘇母喪除入京師以國子監生試第一授弘文院撰文中書舍人晨出敝裘羸馬入院還坐一室勘經史有以詩文請者立使者於戶外削橐與之仕九年乃遷同知延安府事治榆林至則修學建尊經閣以十三經注疏貯閣中縱士子覽觀又采儀禮參以本

朝制度行鄉飲酒禮又援據史傳旁及載紀小說家兼  
從宿將故老詢流寇始末成延綏鎮志二十四卷康熙  
十二年吳三桂叛明年大夫運關中饗十萬入四川至  
寧羌州兵變殺經略莫洛於是巡撫杭愛移駐漢中追  
還所運饗十二月漢中食盡

王師退保西安棧道絕乃從黑水峪間道七晝夜達盩  
屋既抵榆林定邊副將朱龍反逼波羅堡去榆林百里  
而近大夫集士民于漢前將軍關侯廟為文誓侯前願



以死守士民咸感奮乃編什伍明號令製幡幟嚴斥候  
夜自宿城上衆藉以安未幾西川人周繼明聚衆千人  
與神木叛將孫崇雅合陷延安綏德勢張甚榆林兵迎  
戰不利運道塞環城三十里皆賊壘城中刮木皮采蒿  
以食大夫謀於上官率私錢命勇士取徑渡黃河買粟  
於山西之保德河曲突圍以入當是時延安一府縣十  
九城堡三十六相繼淪陷惟榆林城獨完圍既解餘寇  
據響水清平鎮羅諸堡大夫騎匹馬喻以禍福及神木

崇雅繼明皆降事平論功加一級十七年

詔舉博學宏詞之士有以大夫薦者徵詣

闕既至遷知登州府事會大夫子有鎡已納婦矣而天  
大夫悲不自勝疾發遂卒譚氏之居在香花橋東其坊  
曰碧漪堂之左有鴨脚樹三本彛尊童子時與大夫兄  
弟讀書其下一日語彛尊曰詩書莫不有序子知周禮  
亦有序乎答曰不知也曰尚書周官一篇即周禮之序  
矣其讀書善悟類是大夫好撰述游昌平著肅松錄二

卷又嘗著爾雅綱目一百二十卷所為詩古文辭有嘉  
樹堂集二十卷鴛鴦湖權歌一卷卒之歲年五十有七  
娶李氏女子二人一嫁陸大勲一嫁沈以機皆國子監  
生其墓也在某原銘曰

生而逸後乃勞陸走叢菁川波潮文不遇學則優終為  
右史雄詞曹長榆林塞土磽疏泉種稻成樂郊寇宄起  
如牛毛登陴以守氣不撓綰左符亦足豪屈首置下尻  
居高嗟善人壽宜多生子夭折命安逃相斧屋度隰臯

伐石書銘鑱諸幽

徵士徐君墓誌銘

唐制博學宏詞有科廢不行久矣康熙十七年

天子法古爰

命內外大小臣工各舉所知徵入都於是浙江巡撫以

海寧徐君林鴻應

詔明年春

召試太和殿庭布席

體仁閣下中使傳

旨向來殿試進士定例立而對策今以爾等積學博聞  
特賜坐賜食食謝

恩畢既納卷次日

天子行大蒐禮次郊圻東卷

授三大學士暨掌院學士定其高下君時名籍甚又與  
同里吳君農祥王君嗣槐吳君任臣蕭山毛君奇齡宜  
興陳君維崧咸為大學士馮公延致邸第都人所稱皆

山堂六子也僉謂讀卷者馮公卷不彌封君必見錄及  
駕旋

命下入史館者五十人授中書者七人君乃見遺君子  
於是歎馮公之無私尤服君之不肯干進也君學通今  
古凡山川險隘錢穀鹽筴之出納律令格式之寬嚴皆  
總其要又工於作奏以是督撫大吏學使驛使交引以  
自助然取與不苟館穀所入不能治田園所居破屋數  
間清池半畝時與故交把酒劇談以為樂居幕府削尺

牘晝夜多至百函善寫人胸臆賦才瀏亮古詩音逼齊  
梁近體和平婉麗獨不愛曲子有強以填詞者倚聲歌  
之陰陽悉中律嘗客貴州勸巡撫因民之俗立瞿公式  
耜張公同敞祠為作神絃迎送之曲土人歡忭華冠繡  
衣擊銅鼓鳴鐵蘧歌焉曲終苗童犵女皆感慨泣下其  
于史事尤練達本末不曲徇黨人之論分撰通志發凡  
立例綱目秩然論者以君不與纂修明史之列交惜之  
君善鑒賞別書畫禮器偽真兼善飲嘗過顧御史豹文

別業御史知君大戶出雷尊貯酒容一斗賓客多避席  
君連舉者三御史曰此何年製也君笑曰北齊文宣帝  
天保六年避暑晉陽宮所作也驗其下款識果然知永  
嘉縣事漢陽王君世顯去官留杭州處士南昌王君猷  
定寓昭慶僧舍先後客死君視舍斂送其柩至江浦乃  
還太倉王徵士吳慈谿周處士容卒于京君為治喪收  
其文集以竢奔者蓋君急于交誼若是不獨以孝友稱  
門內而已君之先本莆田林氏後分支台州之黃巖再



徙海寧贅徐氏因襲其姓曰輅嘉靖庚子舉人仕為福  
建永安知縣君之曾祖考也曰元倬考也妣某氏君字  
大文一字寶名少補學官弟子生某年月日卒某年月  
日享年六十有九配茅氏明按察副使坤之孫某之子  
繼娶姜氏封監察御史某之子繼娶張氏某官某之孫  
處士某之子君有子男四人司祿司錫俱錢塘縣學生  
司祿繼從祖後司紀司直殤女六人孫男二人女二人  
其葬也于某原某年月甲子葬之日也銘曰

古於制科期收實學

天子曰咨惟元老是擢嗚呼斯人才與命妨懷彼珠玉被褐而亡升者在朝棄者在野不有銘詩孰知君者

翰林院侍講尤先生墓誌銘

先生姓尤氏諱侗字同人更字展成別字悔菴又曰艮齋晚自號西堂老人西堂者先生讀書之所也先世家無錫遠祖衷以政事文學著南渡初詩家所稱尤蕭范陸是已子孫世登膺仕載萬柳溪邊舊話其後轉徙長

洲之斜塘曾祖某有隱德祖某舉鄉飲賓考淪國子監生

敕贈徵仕郎翰林院檢討亦兩舉鄉飲賓妣孺人鄭先生少日博聞強記有才名補學官弟子厯試于鄉不利貢于

廷謁選除永平府推官不畏強禦以事降調康熙十七年春

天子仿古制科取士或薦先生于

朝

召試體仁閣下

上親擢五十人悉除翰林纂修明史同日入院先生最長以齒序四十九人皆坐其下留史局三年分撰志傳多至三百篇

覃思授徵仕郎子珍以進士出身改庶吉士先生乃告歸家居以詩文縑素請者盈庭戶先生揮灑不倦有求必滿其意同時汪編修琬居堯峰以古文自矜少可多

怪見俗子議文章者恒面斥之以是人多畏縮咸樂先生之和易也歲己卯

天子南巡先生入見

御書鶴栖堂扁額以

賜時先生年八十有二矣猶康彊善飯暇相地於官山之陰築生壙自為之誌結丙舍曰草草山房俾予分書予嘗以天台萬年藤杖奉先生并歌以贈先生喜劇然猶未窘于步不藉扶持也歲癸未

天子復南巡進先生官侍講甲申六月日以疾卒距生  
明萬曆四十六年閏月日享年八十有七配曹孺人有  
賢行官右春坊右贊善兼翰林院檢討者長子珍也次  
瑞縣附學生女三人一嫁縣學生湯萬煊一嫁陝西提  
學按察僉事候補布政司參議陸德元一嫁縣學生金  
秉寬孫男一人世求以歲貢生考授知縣以能詩聞女  
五人俱配士族曾孫一人先生名雖未登甲乙榜早為  
文社倫魁弟子著錄者多大學士崑山徐公元文其一

也所作詩文流傳

禁籟

世祖惜其才命相妨終受

聖主之知官之翰苑屢承

殊渥今年春彝尊詣杭州偕前輩德清徐公倬謁見

皇太子于行殿

令旨賜坐謂曰老成易謝茲來又失一尤展成美字而不名洵異數也已先生著述甚富所撰西堂雜俎觀者

胥悅奉為兔園冊晚輯艮齋雜記學者服其雅馴全集  
五十四卷餘集七十卷鶴栖堂彙十卷俱鏤板行於世  
銘曰

士也懷才或不售遭逢

聖世終旁求圭璋特達自有期鶴書

召君六十餘俾入史局掌詞曹君之才大筆不休有若  
札札機絲抽趨庭有子登亨衢遺榮辭老返衡茅難進  
易退世所高君子故里恣逍遙水哉之軒蘭葉舟琴瑟



几杖官山幽達天知命故不憂鶴栖堂深

御墨留人生百歲語本虛八十有七齒已優著史況足  
名千秋君今含笑歸山丘吾銘維實信不浮

承德郎日講官起居注右春坊右中允兼翰林  
院編修嚴君墓誌銘

康熙十有七年春

天子法古制科取士

詔在廷諸臣暨外督撫大吏各舉博學之彥毋論已仕

未仕徵詣

闕月給太倉祿米明年三月朔

召試太和殿廷發題賦序詩各一首學士院散官紙光祿布席

賜譙體仁閣下於是無錫嚴君成省耕一詩而退賦序置不作也

天子擢五十人纂修明史部議分資格進士出身者以館職用餘給待詔銜俟史成日授官

詔下五十人齊入翰苑布衣與選者四人除檢討富平  
李君因薦吳江潘君耒其二子及君也君文未盈卷特  
為

天子所簡尤異數云未幾李君疏請歸田養母得

旨去三布衣者騎驢入史局卯入申出監修總裁交引  
相助越二年

上命添設日講官知起居注八員則三布衣悉與焉是  
秋予奉

命典江南鄉試君亦主考山西比還歲更始正月幾望  
天子以逆藩悉定置酒

乾清宮飲讌近臣

賜坐殿上樂作羣臣以次奉觴上壽依漢元封栢梁臺  
故事

上親賦昇平嘉讌詩首倡麗日和風被萬方之句君與  
潘君同九十人繼和

御製序文勒諸石二月潘君分校禮闈卷三布衣先後

均有得士之目而館閣應奉文字院長不輕假人恒屬  
三布衣起草未幾予與潘君俱罷歸而君尋遷右春坊  
右中允兼翰林院編修

敕授承德郎時二十三年秋七月也冬典順天武闡鄉  
試事竣君乃請假

天子許焉當君未仕愛縣西洋溪丘壑竹樹之勝思買  
墓田丙舍終老溪有橋曰蕩蕩因自號蕩蕩漁人時山  
陰吳公廷祚方知縣事許助草堂之資會應

召不果既出都遂浮舟度嶺訪吳公於肇慶采硯而還  
自是杜門不出築堂曰雨青草堂亭曰佚亭布以窠石  
小梅方竹宴坐一室以為常君為文無定格不屑蹈襲  
前人適如其意而止詩篇沖融恬易鮮矯激之言慢詞  
小令雅而不艷所著秋水集雜文七卷詩八卷詞二卷  
嘗屬予序之少工書法入晉唐人之室兼善繪事山水  
人物花木蟲魚靡不曲肖尤精畫鳳翔舞竦峙五光射  
目觀者歎息以為古畫手所無晚歲曾一修縣志叙族

譜有以詩文圖畫請者駁不應暇輒掃地焚香而已君年六十有一返里居以康熙四十一年正月卒享年八十先世自餘姚遷無錫之嚴埭曾祖朔贈通議大夫南京通政司通政祖考一鵬萬厯丁丑進士累官刑部左侍郎贈尚書考紹宗縣學生以君貴

贈如君官君諱繩孫字孫友娶王氏中憲大夫知福州府事闕之女封安人子三沆曾殤泓曾溶曾孫六人

曾孫五人其卜兆也在縣西蕭家灣銘曰

君之通籍也

天語諄諄謂史局不可無此人君之請假也行將發輒  
敕錄所撰詞以進蓋受

主知者深矣瀉瀉之橋洋溪之潯秋水時至比於君心  
陸羽王紱庶嗣其音

曝書亭集卷七十六